

DOMINGU XVII TEMPU KOMÚN – TINAN A

Tema

Liturjia domingu ne'e nian konvida ita atu refleto kona-ba ita-nia prioridade sira, ita-nia valór sira ne'ebé sai fundamentu ba ita-nia ezisténsia. Ema sarani tenke harii ninia moris iha valór sira Jezús propoin.

Leitura dahuluk apresenta mai ita ezemplu Salomão nian, liurai Israel nian. Nia mak protótipu ema “matenek” nian, ne'ebé konsege komprende no hili buat ne'ebé importante no la husik atu valór ne'ebé liu lais babeur nia.

Iha *Evanjellu*, hodi uza linguajen aikanoik nian, Jezús hameno ba ninia maktuir sira atu halo Maromak nia Reinu ninia prioridade fundamentál. Valór no interese sira seluk tenke liu ba planu daruak, iha “rikusoin” boot liu Reinu nia oin.

Leitura daruak konvida ita atu tuir Jezús nia dalan no proposta. Ne'e mak valór aas liu, ne'ebé tenke mai uluk valór no proposta sira seluk.

LEITURA I – 1 Reis 3,5.7-12

Liurai boot David mate iha ± 972 mK, liutiha ukun ida naruk no fekundu, haluan reinu, hametin uniaun entre tribu sira norte no súl no lori dame no hakmatek ba Maromak nia Povu. Nia oan Salomão mak troka nia.

Salomão hala'o knaar mne'ebé di'ak iha estrukturasun ba reinu ne'ebé nia aman husik ba nia. Nia organiza divizaun aministrativa reinu ne'ebé nia simu nu'udar limarohan, harii konstrusaun boboot (ez. Templu Jerusalém nian), habiit sidade importante sira, potencia interkâmbiu kulturál no komersiál, haburas kultura no arte.

Tan preokupa ho konstituisaun klase polítika ida ne'ebé preparada ba knaar governasaun, Salomão rekruta ema “matenek” estranjeiru (liuliu husi Ejitu) ba ninia kadunan no ema ho matenek, justisa no prudénsia mak haleu nian. Ema sira ne'e la'ós de'it fó konsellu ba liurai maibé mós prepara futuru “funsonáriu” sira atu hala'o knaar governativu.

Salomão nia kadunan/korte sai “viveiru” ida “sabedoria” nian. Salomão nia emar “matenek” sira” hakerek provérbu sira ho karáktar sapiensiál, fó “instrusaun” sira (kona-ba virtude sira) atu hetan ksolok. Iha faze ne'e, sira mós hakerek krónika kona-ba ukun anteriór sira no publika testu kona-ba tradisaun beiala sira nian (karik iha époka ne'e mak “eskola jahwista” hamosu tradisaun ruma ho fatin importante iha Pentateuco). Nune'e, ita la hakfodak katak Salomão hela iha memória istória Israel nian nu'udar protótipu liurai matenek nian, “ninia matenek hakat liu ema husi lorosaee no ema Ejitu nian” (1 Re 4,30).

Salomão mós mak liurai dahuluk ne'ebé simu ukun nu'udar limarohan. Molok ne'e, nia beiala sira simu ukun husi Maromak. Teólogo sira Israel nian, buka halulik Salomão nia podér hodi hatudu katak, se Salomão ukun Maromak nia Povu, la'ós de'it tanba direitu limarohan nian maibé tanba Maromak nia hakaran.

Testu ne'ebé propoin mai ita hatudu buat ne'e, katak Maromak hili nia. “Mehi Gabaon” nian (kf. 1 Re 3,5) mak fiksaun literária ida teólogo deuteronomista sira inventa (grupu ne'ebé refleto vida no istória iha liña sira ideia teolójika apresenta iha Livru Deuteronomio nian) ho finalidade rua: apresenta Salomão nu'udar ema ne'ebé Jahwéh hili no justifika ninia “sabedoria”.

MENSAJEN

Iha Testamentu Tuan, “mehi” mosu ho frkuénsia, nu’udar forma Maromak hili atu komunika ho ema sira no hatudu ba sira Ninia dalan. Iha ita-nia testu mosu mós mehi ida: katekista deuteronomista sira uza rekursu literáriu ne’e (mehi) atu apresenta Salomão nu’udar ema ne’ebé Maromak “hili”, ema ne’ebé Jahwéh komunika Ninia projetu sira no konfia Ninia Povu atu nia gia.

Salomão nia “mehi” iha forma ida diálogu nian entre Maromak no Salomão. Uluknanai mai Maromak nia interpelasaun (“sá mak Ha’u bele fó ba ó”); hafoin mai Salomão nia resposta: konxiente kona-ba ninia knaar nia todan no ninia limitasaun sira, foin-sa’e ne’e husu ba Maromak atu haraik ba nia fuan “matenek” ida atu ukun ho justisa. Liurai nia orasaun Maromak simu no haraik ba nia “sabedoria” ida ne’ebé ema seluk ladauk iha (iha mós prezente seluk Maromak fó ba nia, maski testu ohin la temi: rikusoin, glória no moris naruk – kf. 1 Re 3,13-14).

Autór deuteronomista, liuhusi *fiction* ne’e, uluknanai hakarak hato’o katak, iha Israel, liurai mak “Maromak nia instrumentu”, intermediáriuentre Maromak no nia Povu. Liuhusi liurai mak Maromak governa, intervein iha Povu nia moris no lori nia iha istória.

Hafoin, testu hatudu katak Salomão la haree ninia papél nu’udar priviléjiu pesoál ne’ebé bele uza ba ninia benefisiu rasik, maibé nu’udar ministériu ida Maromak haraik ba nia. Salomão koxiente katak autoridade mak servisu ne’ebé nia tenke hala’o ho “sabedoria” no objetivu finál ezersísiu ne’e nian mak di’ak komún nia realizasaun.

Finalmente (no karik ida-ne’e mak aspetu signifikativu liu ba tema liturjia ohin nian), autór sira subliña “kualidade” Salomão nia resposta nian: nia la husu rikusoin, la husu mós glória, maibé husu aptidaun no kapasidade ne’ebé nia presiza atu kumpre misaun ne’ebé Maromak konfia ba nia. Salomão sai modelu ema ne’ebé hatene hili buat ne’ebé importante no la husik nia an sai distraidu ba valór sira ne’ebé liu lais.

Hodi dehan katak Salomão nia harohan “haksolok Na’i” (vers. 10) katak propoin ba israelita sira atu hili valór rohan-laek, ne’ebé dura, esensiál.

LEITURA II – Rom 8,28-30

Testu ne’ebé ohin propoin mai ita kontinua Paulo nia reflesaun kona-ba projetu salvasaun ne’ebé Maromak ofere se ba ema sira.

Ita haree ona iha domingu sira liubá katak, iha Paulo nia perspetiva, ema hotu ne’ebé to’o iha mundu ne’e moris iha kontestu ida salan nian ne’ebé marka no kondisiona nia (kf. Rom 1,18-3,20); maibé, Maromak, iha Ninia laran-di’ak, ofere se ho modu gratuitu ba ema maksalak Ninia grasa no fó ba nia possibilidade atu to’o ba salvasaun (kf. Rom 3,21-4,25); iha Jezús Kristu mak don ne’e komunika ba ema (kf. Rom 5,1-7,25). Espíritu Santu mak tulun atu ema hakohak don ne’e no moris iha fidelidade ba grasa Maromak ofere se (kf. Rom 8,1-39).

Asegura tiha sarani sira Roma nian no sarani sira ohin nian, katak Espíritu “mai tulun ita iha ita-nia frakeza sira” no “harohan daet mai ita” (kf. Rom 8,26-27), Paulo fó hanoin hikas katak Maromak soi projetu ida domin mai ita: ofere se salvasaun liuhusi Jezús.

MENSAJEN

Maromak nia planu salvasaun nian ofere se ba ema hotu. Sira ne’ebé adere ba projetu ne’e, Maromak bolu atu identifika an ho Ninia Oan Jezús, hasai sira husi egoíзму no salan no halo sira, ho Jezús, to’o ba moris foun no nakonu (justifikasaun).

Iha kontestu ne’e, Paulo ko’alia kona-ba “ema sira” ne’ebé Maromak “koñese” molok, ne’ebé

“predestina” atu moris tuir Jezús nia ilas, “bolu” sira no “glorifika” sira. Maski nune’e, versíkulu sira ne’e presiza komprende iha sentidu katak salvasaun ne’ebé Maromak oferese la’ós ba de’it grupu ida predestinadu sira-nian. Teolojia paulina hatudu momoos katak Maromak nia projetu salvasaun nakloke ba ema hotu ne’ebé hakarak simu Nia. Buat ne’ebé Paulo subliña mak don gratuitu Maromak nian no don ne’e Maromak prevé kedas husi tempu rohan-laek.

EVANJELLU – Mt 13,44-52

Domingu ne’e ita remata leitura kapitulu dedika ba “aikanoik Reinu” nian (kf. Mt 13). Ho ilas no komparasaun simples, sugestiva no kuestionante sira, Jezús apresenta mundu foun liberdade no vida foun ne’ebé Nia mai propoin ba ema sira no iha-ne’ebé Nia hanaran Maromak nia Reinu.

Konkretamente, ita-nia testu apresenta aikanoik tolu ne’ebé Mateus de’it mak iha: aikanoik rikusoin/tezouru nian, aikanoik fatuk-murak nian no aikanoik dai no ikan nian.

Atu enkuadra di’ak liután mensajen ne’ebé Mateus propoin iha-ne’e, ita tenke hanoin kona-ba realidade komunidadade ne’ebé Evanjellu ne’e dedika bá... Ita iha finál sékulu dahuluk (tinan 80 nune’e). Liu ona tinan tolunulu Jezús nia mate. Entuziazmu inisiál fó fatin ba monotonia, ba falta empenhu, ba moris “morna”, ladún ezijente no la kompromete an. Besik daudaun tempu sira persegisaun no sarani sira seidauk eh ladún prontu atu enfrenta difikuldade sira. Mateus sente katak presiza hafoun kompromisu sarani no bolu atensaun fiar-na’in sira nian ba Reinu, ba ezijénsia sira no valór sira Evanjellu nian. Aikanoik sira ohin nian integra iha kontestu ida-ne’e.

MENSAJEN

Testu Evanjellu domingu ne’e nian bele fahe ba parte tolu. Iha parte ida-idak iha aspetu no kestaun sira ne’ebé konvein atu subliña no tau atensaun.

Iha parte dahuluk, ita iha aikanoik rua – aikanoik rikusoin ne’ebé subar iha to’os no aikanoik fatuk-murak nian (vers. 44-46), ne’ebé deznevolve tema hanesan no apresenta hanorin hanesan.

Kestaun prinsipál mak deskoberta kona-ba valór no importánsia Reinu nian. Aikanoik rikusoin ne’ebé subar no aikanoik fatuk-murak fó hanoin katak Reinu ne’ebé Jezús propoin (mundu dame nian, domin nian, fraternidade nian, servisu nian, rekonsiliausaun nian) mak “rikusoin” folin liu, ne’ebé Jezús nia maktuir sira tenke hakohak, molok valór eh proposta seluk. Sarani sira mak ema sira ne’ebé, molok buat seluk, sira hetan buat úniku ida, fundamentál, desizivu: Reinu. Bainhira ema ruma hetan “rikusoin” ida importante nune’e, nia tenke hili nia nu’udar rikusoin folin liu, finalidade ikus ninia ezisténsia nian, valór fundamentál ne’ebé halo nia hakribi buat seluk no prontu atu selu presu aas. Provavelmente, Mateus hakarak fó hanoin ba sarani sira nia diri je Evanjellu bá (toba dukur iha fiar morna nian, ladún ezijente, lahó hahalok) katak presiza deskobre filafali no hili ho modu desizivu valór aas liu ne’e, ne’ebé tenke fó sentidu ba sira-nia moris – Reinu. Sarani ida konfronta an ho valór no opsau oioin, maibé nia tenke komprende katak Reinu mak valór ida importante liu hotu.

Iha parte daruak, Mateus apresenta Reinu iha ilas dai ne’ebé, soe ba tasi, kaer ikan tipu oioin (vers. 47-50). Iha versaun Mateus nian, aikanoik ne’e apresenta hanorin ida hanesan ho aikanoik trigu no duut aat (domingu kotuk nian): Reinu la’ós propriedade ema balun nian no taka ba ema seluk no iha nia laran iha sira ne’ebé eleitu, maibé realidade ida iha-ne’ebé aat no di’ak moris hamutuk. Maromak la ansi atu kondena no harahun. Nia lakohi ema maksalak nia

mate; tanba ne'e, nia fó ba ema tempu nesesáriu no suficiente atu nia halo sai tasak ninia opsaun sira no halo ninia hilin sira.

Referénsia ne'ebé Mateus halo ba juizu finál mak forma ida atu ezorta maun-alin sira ninia comunidade nian atu hili ho modu desizivu ba Reinu no tau iha prátika Jezús nia proposta sira.

Iha parte datoluk Evanjellu ohin nian, Mateus apresenta diálogu badak entre Jezús no dixípulu sira (vers. 51-52).

Iha diálogu ne'e ita iha konkluziun ba kapitulu tomak. Mateus sujere katak dixípulu loos Jezús nian mak ida-ne'ebé "komprende". "Komprende" iha teolojia Mateus nian, signifika "fó atensaun" no kompromete an ho hanorin sira ne'ebé propoin. Sarani sira simu konvite atu deskobre hikas realidade Reinu nian, komprende ninia ezijénsia sira, kompromete an ho ninia valór sira. Referénsia ba "eskriba" ne'ebé "hasai husi ninia rikusoin buat foun no tuan" bele refere ba judeu sira, ne'ebé koñese didi'ak Testamentu Tuan ("tuan"), oras-ne'e simu konvite atu reflète kona-ba promesa tuan sira iha Jezús nia proposta nia roman ("foun"). Iha dialétika ne'ebé ezijente nafatin no kuestionante mak dixípulu loos hetan dalan ba Reinu; hetan tiha dalan ne'e, nia tenke kompromete an ho nia ho forma desiziva, ezijente no ho empeñu.